

四庫全書

集部

欽定四庫全書

武溪集卷九

宋 余靖 撰

寺記

東京左街永興華嚴禪院記

上都華嚴禪院者故崇儀使文州刺史岑君所創也岑君諱守忠早侍兩宮屢使於外欣慕禪學遂發洪願天聖五年布金易地於國城之東始建精舍以待什方緇旅明年上賜錢俾之構堂以安清衆而後架具焉章獻

皇太后崇其閑閑而鍾梵全焉

后以資福院燒香鍾賜之

章惠皇太

后益其度閣而廚庫備焉越明年賜額為永興華嚴禪

院隸於左街歲度僧二人仍令長老住持年逾一紀三易

其人而瓶孟弗駐棟宇弗完康定元年乃請今明悟禪

師主其禪席師名道隆潮州海陽人俗姓黃氏得心印

於汝州璉禪師衆推通悟廼膺僉請輦轂之下領袖攸

矚道眼既具衆心悅從來者如歸戶外之屨滿矣購募

檀信日加營緝演法有堂安像有殿紺宇宏壯寺制恢

馬接物利人開益既廣藹然德譽升聞帝聽慶歷二年  
上始賜重陽頌師即箋注進呈上覽之大悅特賜紫方  
袍以寵之繇是御書偈頌提綱語句動盈卷軸師悉箋  
而訓之聖睠益厚後三年復賜大乘頌師亦箋釋和進  
上愈嘉之賜號圓明大師初岑君於錢塘雕造廬舍那  
佛文殊普賢等像布而漆之工未半而不祿匠氏淪廢  
者六年師乃親詣餘杭用錢三百萬命工畢其裝繪舟  
挽而歸師既還闕上撫問錫賚頗復優厚累賜御頌御

書金帛香藥等頻詔入化城殿昇座說法咫尺天顏激揚宗要并賜筆硯令進禪頌仍賜御膳衣物飛帛書等就大相國寺西廡賜解院一區以為朝宿之地尋以聖藻宸翰溢於居室因構閣以藏焉示不敢褻近也因賜瑠璃瓦覆之并賜御飛帛書額曰龍奎之閣歲別度僧一名恩禮加異緇素榮之凡募緣成者由兩序而鍾臺經閣峙焉方丈之室謹宴申也看經之堂勵勤修也異其庫司慎揀請也儼其溫浴尚涓潔也僧坊供具罔不

輯焉其外則敝車院列就舍資之給衆咸有規畫至和  
元年内出水陸畫像五百餘軸賜之廼即西北隅創造  
堂為供設之所再蒙御飛帛書賜名洪濟之殿宣中使  
押左右街僧道威儀教坊鈞容班樂輦卒衛兵奉迎至  
院嘉祐二年特勅加賜明悟禪師之號恩無出其右者  
師以為信之所起必始於莊嚴故不憚於有為也理之  
所通必去其攀緣當遺照而無著也乃具表辭免不入  
城闕於今一紀矣叢林之衆至者不下數百所度弟子

百餘人賜命服摠禪衆者三十餘人於戲非岑君之崇  
尚佛事無以創其基非禪師之恢宏宗旨無以廣其制  
自國朝已來以田衣見上者趨皇闈瞻黼扆則有之矣  
至若對萬乘昇高坐談性相之實指佛祖之心無如禪  
師之比者其箋解聖作訓繼宸章間發言機直趨覺路  
宜乎睠賚之頻煩也而又高謝紛華超出名相冥心息  
跡歸於無事直佛法之摠持禪門之體用也可記也哉  
嘉祐四年十二月日記

韶州善化院記

仲尼居魯而儒學之風隆於洙泗秦皇好兵而將帥之材出於山西六祖開化曹溪而塔廟之興布於曲江蓋聖賢特出熏而炙之故跂高慕遠者與習俱盛也韶州生齒登黃籍也三萬一千戶削髮隸祠曹者三千七百名建刹為精舍者四百餘區豈非祖風宏扇人心偃順而欽崇者夥乎鄉曰豐樂里曰長容北出州治三十里而遙有院曰善化唐朝舊額也五代兵火之後其名僅



存雍熙二年始有草茅之室檀越列名請袁州僧皓隆主其熏修迄至道中隆師示寂上足紹緣尸承厥位緣師表姓亦分宜人弱歲隨隆來及其卒而嗣焉初院在山椒垣墮隘陋自景德初年緣師乃經始寬平而徙其基揭舊名而署之募資購材斧斤不絕至天禧之末而考室凡十八年間乃得環合立鵠而名殿以安其像度筵而築堂以崇其法重樓而擊鍾以庶乎息苦連牀而會食以示其容衆至於庋閣之司春炊之所折衷豐約

罔不具焉清溪如帶繚繞前左長梁下亘虛亭上覆徙  
倚軒檻可以優遊真塵外之嘉致也又嘗於雍熙至道  
間悉委瓶盂羨餘市東臯之田以具饘粥於戲能創其  
基者父之事也能繼其志者子之力也文王無憂於其  
國以王季為之父也臧孫有後於其家以哀伯為之子  
也浮屠氏託大義於父子而本非骨肉之愛乃能恢崇  
堂構以昭前人之光又能捐其蓄積市易田產以貽後  
世之利此其可書以垂勸也彼滔滔然趨走權貴之門

窺伺常住以圖割削用實私橐者視師之績得無愧乎  
以某嘗帖職於修書之殿評詞其實以示亡窮既嘉之  
因不復讓康定元年九月日記

惠州開元寺記

自漢迄今僅千祀天下郡國之勝遊雲泉之絕境精廬  
居之殆且徧矣蓋名僧高士無世無之或潛光丘壑洗  
心閒曠山林所以棲息或應現度人隨機示化國邑之  
所歸仰日聯歲續人去迹存此乃鍾梵相聞不為多矣

有唐開元天子號令翔於四海每為新制以自張大乃  
命祠曹州擇一最勝寺易以年名冠之俾後世知聲教  
之廣被也故天下寺以開元名者必基爽塏據形便祠  
宇最壯像設最嚴網維最親而不苛制度最古而有序  
惠州治城之南二里則所謂最勝之寺也古者邑而未  
郡山猶林莽虎狼宅之肆害民里東漢之末有僧曰文  
簡掛錫棲此猛獸馴伏因為伏虎臺云郡本百越之地  
漢隸南海晉為東營郡晉武帝咸寧元年太社青氣屬

天占者云東營有帝王之祥於是以惠管王伋徙封瑯琊是歲明帝始生伋即其祖中興纂紹實啓祥應於此建刹錫名隆興隋文帝削平江左南北一統因得西域舍利偏置名山俾築塔而藏之又改曰舍利道場至開元二十八年乃賜今號奉安睿宗皇帝御容至今存焉茲寺重崗複阜隱映巖谷長溪帶盤湖光相照探幽賞異一郡之絕故累朝詔擇名藍錫以嘉號而常在其選郡廷精揀經論名德署為僧職以摠領紆衣亦多其人

乃知其名實不相浮矣咸平三年以鬱攸之災悉為煨  
燼不有廢也其何以興於是即其舊基沿同草異或出  
自私楮或募於檀信凡為棟宇若干間堂殿若干所扶  
土設色肖像而爭勤捐金弛具不謀而同力禪徒律學  
各有攸居初寺之名舍利道場也有石刻以誌其本末  
崑崗之焚字無完點及其再造四十餘年矣遺緇故老  
存亡相半陵谷之變將無紀焉以某嘗登東壁之府倦  
遊而歸僉來乞詞以為後觀由是詢邦誌採耆言筆之

於石以備遺逸康定二年龍集辛巳六月日記

韶州月華山花界寺傳法住持記

人之大倫在乎三本父者生之君者治之師者教之父  
子天性至親而不易君臣同體至一而不可擇惟師則  
不然去就之分視德之輕重故無位而尊無賞而歸者  
道之所在云耳子夏之居西河康成之處北海傳經著  
錄不異洙泗豈有督之者哉金仙之教被於中國及心  
法西來百年之間傳至大鑒而法斯溥矣月華山者招

提惠朗禪師演法之地也招提視大鑒猶曾祖父也大  
鑒門人高第者廬陵思衡岳讓讓傳大寂居江西世呼  
馬祖是也思傳希遷居南岳之石頭建中正元間方袍  
之學心者江衡千里道路如織亦西河北海之風也石  
頭之入室者有大小朗招提為大朗以其不出招提三  
十年故號招提朗然其門人劉軻為之碑甚詳云朗曲  
江人俗姓歐陽氏年十三於州鄧林寺出家二十於岳  
寺受戒既而曰戒豈律我哉乃往龔公謁大寂得佛無



知見之說遂歸於岳畫操井臼之役夜與其徒發圻齒  
鍵石頭即世終喪乃去正元十一年將遊羅浮途次曲  
江之都渚乃曰茲地清氣盤鬱亦足以棲神矣遂駐錫  
居之四方學者尋聲而至無虛日矣招提既沒衆散而  
寺亦榛廢其後百餘歲當劉氏稱漢於南海也有實智  
禪僧清裊者自範金銅羅漢像十八軀進獻劉主中宗  
因得延見引問之際器識高遠劉主乃於碧玉殿備浮  
圖氏威儀俾裊升正座說法其主自處西嚮聽之仍俾

奉羅漢像自銓勝地以圖熏修乃即招提故基置寺以  
國命賜名龕其像至今存焉實以癸亥年來至壬申為  
亂兵所害其徒光政繼主其院三十年真宗皇帝即位  
改元之歲賜寺額曰花界四年光政因衆命以院讓道  
尋再為什方居傳八世至今長老琳公景祐元年以州  
命而尸之自正元十一年至是歲凡二百四十三年自  
招提至琳公凡十二代以其屬自相傳不敢處師座者  
五餘則以國命州命衆命凡有所宗者七世焉然而學

徒或來或不來所謂去就之分視德之輕重也琳生曲江都渚鄧姓祥符初寺為外火所延一瓦無完琳公時在徒弟中與知事輩戮力營豎既而歎曰識心達本是謂沙門何泥於有為耶乃優游江淮徧叅師席初博通內外典攻詩屬文所至推為文章僧尋復悔曰多聞亦病耳遂諱作詞章洞山自寶禪師見之曰此大乘器也既印其心又欲以院讓之再讓皆不受還曲江於方山結庵而居今所謂白蓮庵也漕使鄭公載疏名以請之

再辭不免升座而學人四至完舊創新無物不具植茶  
樹果給衆皆餘此又餘力於有為也因書其始末云年  
月日記

韶州光運寺重修證真照寂大師塔銘

世稱佛為浮圖氏蓋即其塔而名之釋迦在世說法時  
云有過去多寶佛塔從地踊出則知塔之名制尚矣所  
以嚴事古佛之道也佛去世後舍利子塔徧於大千祖  
師西來全身之塔布在中土且夫氣聚而形全神散而

體壞有生之同患也佛以自在冥其心故湛而常寂以  
定力持其身故沒而不朽此其所以示至虛無著之性  
成金剛堅固之體者歟何其千百年間造化寒暑不能  
奪而變之耶光運寺塔者奉安照寂大師坐亡之全身  
也大師郴人朱姓諱道廣真性等空大慈利物願力深  
廣存亡以之含識蒙其潤澤故歸仰亡替唐天寶二年  
禪坐而終門人瘞而異香滿室乃奉其全體覆以香泥  
龕而藏之建塔於寺歲或大旱民往誠請則獲嘉澍如

遠壑之應聲也是寺以隋初建刹故名仁壽臺及大師  
居之世呼廣和尚院至廣明中刺史謝公惡其斥賢者  
之號遂以年名加之曰廣明院劉氏專制南海謚大師  
曰輔聖又命其塔曰寶元寺曰光運每歲同六祖真容  
並以龍舟迎至廣內又益其謚曰證真照寂焉開寶中  
王師既克廣州遂遷其卒於京師不樂北遷者相率為  
叛寺塔罹鬱攸之禍而晦容獨存厥後雖構緝遺宇力  
不足而屋之天禧初寺僧嘗欲募衆興復茲塔始基之

而不克締構二十餘年風隳雨蠹棟幹斯壞曲江素號山川竒秀而復熏以南宗之風由是占形勝依邑落而樹剝構舍為精廬者差倍他境緇衣之徒渡江而來不之衡廬則之曹溪故其挈瓶錫勤道路探幽深者亦差衆諸部郡人根性好善者復以談空樂施為勝其緇徒之守戒行興佛事了宗乘者各以其氣相親今天子以寶元受冊之明年郡郭耆壽等列名請晉康郡僧德誠南康郡僧智潤共主營造之事誠潤二開士遊方十餘

歲常以率導喜捨所至開信既允衆誠四方聞義樂出財貨唯恐在後凡為塔三級藻井黼帳髹柱繪梁層簷之上響以金鈴綵疏之外周以廡序越一歲而工畢其告成也乞飼書之予觀大師石刻行狀云持盂所得同之一器先飼貧病然始自食均以精麤等其豐鮮又曰吾食於人得不同病於是感通致雨以救歲旱集是二美推之於仁義之途則古之博施高行君子何以尚之豈獨以佛事為倭子因序而銘之不憚煩以示於後人



施無貴賤 飯先貧病 慈悲普濟 十地齊聖  
仰食於人 即同其憂 言行相副 千古揚休  
性如虛空 無住無去 眸容儼然 金剛堅固  
黼坐照日 寶鐸鳴風 深誠感衆 開士之功

韶州南華寺慈濟大師壽塔銘

天下伽藍以夏臘繼承自相統率者蓋萬數焉田郡縣  
之令選於州鄉以領其徒者且千數其名山福地奉朝  
廷之命擇於叢林以闡其教者無數十焉菩提達磨心

法東傳以衣為證止於大鑒故曹溪之比又加少焉今  
皇帝嗣統之初也奉母儀內助之慈尊釋氏西來之教  
詔於衡廬擇人紹隆祖席僉曰當今雄辯通識無踰雲  
蓋禪師者湖南按察使即以名聞詔賜命服師號以寵  
之俾擇名僧自佐禪師名寶緣興元人遊方至隨州參  
智門禪師祚投針契理得意忘言以心印心不煩機接  
遂為之嗣即雲門之嫡也尋領衆居唐興南臺雲蓋皆  
南岳之名藍也黜空破有不涉名相臨鋒迅發直示宗

乘諸方稱伏謂之禪窟故詔旨求人無敢先者駐錫茲山殆將逾紀一音演說四方流布衆中得法而去者多為人師其機緣語句門人各著序錄此不復記教門崇建規制昂新可謂祖堂中興矣既而歎曰嘻止矣佛言世間出世間法備矣山河大地有時而盡況於人乎雖性空無着體質當有所歸愚夫以死為諱小乘以涅槃為樂皆非中道吾其自營壽藏以安時處順可乎旁鑿窰道上為窰塔在寺之西南二里而遙因僧惠實龍岩石

乞銘以誌之其銘曰

拘士煩思 以身為累 達人靜觀 如幻之寄  
花葉盛衰 根性不壞 見聞覺知 豈藏於斯

筠州洞山普利禪院傳法記

近世分禪律為二學其所居之長禪以德律以親而授  
之以德者選於衆而歸之者亦衆夫言德者非世所謂  
德也以其等空妄超漸次出死生可以為天人師者耳  
故祖祖孫孫稱佛嗣焉筠之望山曰新豐洞有佛剎曰

普利禪院唐咸通中悟本大師始翦荆而居之悟本得  
心印於藥山儼儼得於雲巖巖得於石頭遷遷得於  
青原思思得於曹溪能是為六祖自釋迦如來二十九  
世而至達摩傳中國五世而至曹溪又五世而至悟本  
凡三十九世矣及悟本之即世也得法而去者道全居  
中山道虔居青林相繼來嗣之悟本又傳曹山寂寂傳  
道延居鹿頭及道虔卒鹿頭又續之鹿頭延卒其門人  
惠敏襲之惠敏卒嗣和尚自淨業來繼之李氏之稱國

主也覺海國尊師啓大道場於金陵之報恩其嫡曰文坦  
被黃紙詔書賜號大沙門來統之雲門真禪師之上足  
曰清稟亦奉主命來後之稟卒而豫章彦聞因之及彦  
聞而衰矣輒以院付其徒檀越不可乃疏請九峯守詮紹  
之九峯亦本境之名藍也移法席至是山五年復為廬  
山棲賢所請而去詮傳曲江曉聰聰傳合淝自寶實又  
傳曲江鑒遷繩繩興之寶師得法於黃梅聰與遷皆雲  
門之嗣孫自悟本主遷或絕或承凡十三代詮徙棲賢

寶徒黃蘗自聰已上皆終焉悟本諱佹价越州諸暨人  
姓俞氏年十二師事五洩二十一受具於嵩山睿律師  
慕南宗之學南遊江湘得雲巖而事之終其身畢喪而  
後去遇武宗之詔遂民服隱於箕州及宣皇御宇乃復  
僧儀南至高安之所豐洞邑豪雷衡之山也見其泉石  
幽奇乃曰此大乘所居之地言於雷氏雷氏施之初山  
多蛇虎師庵居一宿蛇虎盡去至今山無虎焉留居十  
八年名聲四傳來學者五百餘衆坐談立悟虛來實去

者不可勝數聞京師天子賜咸通廣福寺額并一鍾焉  
尋以咸通十年三月順世先期其日期至而去徒衆環  
泣師瞑而復覺曰心無所依是真修行何有悲喜勿驚  
吾也復令為齋七日乃具師食訖沐浴安坐斂容而化  
葬於山之陽勅謚悟本大師塔曰惠覺之塔師能攻苦  
率衆衣無綵卧無褥爐無炭室無燭故後世以簡約相  
承焉集大乘經要一卷行於世中山全姓宣氏常州人  
以其嘗居雋水之中山故號中山和尚中和二年鎮南



節度使鍾傳實召以來景福二年避寇於分寧制置戴  
尚書迎居龍安院明年坐亡於龍安歸葬寺之東青林  
虔姓陳氏杭州餘杭人初謁悟本悟本曰此子向後走  
殺天下人廣初抵南鄭遇賊巢之亂駕幸梁洋時有中  
貴人姓第五者見師瞻視良久曰此是法王非同龍象  
也自漢東之青林亦鍾鎮南召之天祐元年滅虔門人  
錄其語三百節為玄機示誨集鹿頭延姓劉氏福州長  
樂人江南武義二年自鹿頭至凡三年而示寂全身

瘞於寺南賜謚洪果大師塔曰惠光之塔敏姓李氏蜀  
之華陽人從洪果來及其終而代焉保大六年遷化嗣  
姓周氏同郡高安人金陵召見深加信重乾德二年順  
寂塔於惠光之北坦姓吳氏建州建陽人李主以其國  
命命之凡四年而終稟姓李氏泉州仙遊人李主召入  
澄心堂集諸方語要凡十年又俾來繼坦焉彥聞以疾  
而間其位故哀凡三年而卒詮金陵人自九峯來居五  
年大壯其棟宇而新之既赴棲賢之請以首座聰囑檀

那及其衆衆從之請於州州從之聰姓杜氏大中祥符三年實應是命於山之東北手植松可萬株凡植一株坐誦金剛經一卷常自稱栽松比丘今號其地為金剛嶺云聰臨終而讓寶如聰之始聰之終也遺誠於其衆無服衰經哭泣弔慰一切絕之其寺之再興也詮始緝之聰又能經緯至寶而紀綱大備焉寶姓吳氏開堂十六年未嘗出院門自江湖之南及嶺之南二十餘州聞其名者歲奉錢共數十萬以供其堂其為人信向如此

亦種杉萬株皆手自培斲同郡有黃蘗山某院唐裴丞相休之功德院也歲入豐而主者侵牟之衆食不足思有德者為之長景祐四年自太守而下列名請其行又俾其自擇人而付之得遷焉居黃蘗未十日四方至者僅百人蓋其道可師者邪遷姓某氏亦能守寶之規而不敢加焉某上書失職來是郡得其傳法之次叙而記之景祐五年龍集戊寅正月日記

惠州羅浮山延祥寺記

名山大川方域之鎮必藉異人以光其圖牒達才通識  
稠衆之表必託有為以播其績用二美胥副今為難羅  
浮山者越之望也蓬萊一峯堯波所蕩附麗於此水經  
之恠錄也良常諸洞吳郊之秀岫穴相通真受之秘談  
也曰浮屠西來蔓延中國塔廟嚴飾徧宅形勝茲山精  
藍十餘而延祥之基最古梁朝有頭陀僧景泰不知何  
許人薙草屋之號焉朝遊南海暮宿羅浮大同中始建  
寺額以其峯頂二石望之如樓布金所居適在南峯之

下故以南樓命之唐開元二十六年西域僧乾末多羅以鐵肖釋迦真像浮海而去番禺天寶二年中貴人何行成以祠事將命遂迎其像置山歸以玳柑入貢因得御署其門曰延祥之寺仍開明月戒檀於寺之右凡嶺之南落髮壞衣者悉受具於此武宗朝例削其籍咸通恢復而地歸中閣別揭南樓之名於山之西延祥再造苦晚故久不競然亦不敢父子私自相傳必擇什方名德尸之以俟來學初鐵像之來也扶土以具其四體及

祥符初住持僧彥課乃購金佳工易之以鐵而像始完  
彥課卒州以輿議請今長老雲達紹隆禪席達師桂州  
陽朔人幼聰悟師事同郡禪師既削髮即遊方至筠  
州洞山寶禪師付以大乘之要既而曰生本無物何有  
本鄉悟在於心豈須戲論遂優遊南行至於海上有黃  
龍洞者山靈絕境人迹罕到可以逃聲名去思慮於是  
結茅而居期於自得而已俄而學徒推戴以登師座既  
尸其徒則專其憂括囊而來者居於我乎安持盂而求者

食於我乎仰於是募信心以施其財名匠指以利其器  
審高卑面平曠鑿戶牖陶甃甍取於堅完不務華麗曰  
廩歲資悉得其度康定元年達公自袖其狀至於曲江  
俾予書之歸為福地之識明年予因經途詣山於其南  
得張鸞之碑而知其名之始於其側見明月之壇而知  
其制之古於其堂聞達師之問答而知其言之當乃曰  
道如是書之無愧詞康定二年六月日記

循州新脩白雲山普安寺記



大雄氏之教也國無中邇俗無同異人無耆幼士無愚智聞其名氏率用信向非役而隨非威而濟苟有唱導亡不響應答萬家之都十室之鄙必立塔廟以寄瞻仰誰其尸之選在賢者稽其類拔其萃推之於衆無虛授焉龍川郡者漢之名部越之沃野地近魚鹽之饒士多江海之樂故其資奉易足而慙慙易勸且浮圖之道也俾人出貪網斷愛縛守淨默慎熏染廣方便重懺悔俗所以聞聲而樂從者以捨惡徑而趣善途也古有蘭若曰

普安居子城之西隅州人之所崇植也天禧中遇鬱攸之  
災煨燼無餘惟老釋曰智珣相土於閑曠之野得白雲  
山焉掘地數尺有古石像七十餘軀亦精廬之故墓也  
始鳩工而珣即世州將籲衆以今住持僧德廣承其基  
焉鳩其屋以藏像猊其座以存法列鬲而烹以示均擊  
鐘而食以來衆皆古之制也尺椽片瓦力所收焉茂材修  
幹手所植焉嗚呼今夫士庶百族以天性之篤血食之  
重鮮克數世恢隆丕烈者亡他術焉暱於親耳浮圖氏

則不然邑擇於邑鄉擇於鄉超登其良以紹耿光繇世而益昌者此其所長也廣師本郡人張姓受業於聖壽寺受具於南海之祖壇出繼珣師於白雲山擇其良也歲在閏戊戌圖踰嶺謁誌攬其實而書之云爾慶歷六年七月八日記

袁州仰山齊長老壽塔銘

天下地有形勝境有清曠必建佛刹以為民福蓋自漢明已來像教東被日崇月衍棟宇遂繁及乎心印密傳

宗風寔盛通人間出學者雲趨所以名山興壤必安清  
衆又常推擇人譽以崇善繼凡寺之興衰衆之多寡繫  
乎師德之厚薄耳袁州仰山者通智大師之法席也通  
智諱慧寂曹溪之裔孫為山之嫡嗣陸丞相云仰山龍  
縱於江西是也躡履來遊者不下千人於是號為小釋  
迦學徒之盛諸方莫比迨今長老智齊十五世矣齊師  
安州人俗姓某氏徧遊名岳得法於棲賢謁禪師於是  
息心居廬阜三十七歲慶歷中仰山虛坐轉運使齊公

廓詢於緇素以師應選三空四病示人以要啐啄之機  
間不容息或縱或奪至者忘歸住山凡二十年悟而去  
者亦多矣乃於集雲峰下自為壽藏而種松千株且示  
世間之法無所染著皆如幻住死生之理無所厭苦皆  
如夢覺何必語言然後為學惠陽僧智清以其書及其  
直來且言師之行也如此因其歸以銘寄之


聖凡一性 死生一息 悟者一言 頓超凡域  
湛然常存 無喪無得 千株松下 來者之式

潭州太平興國寺新建戒壇記

儒之所先曰行釋之所守曰戒行不修則五常無以立  
戒不持則萬法無所依故曰行與戒皆所以制惡趨善  
防非止過之本也西方之教尤為精嚴佛住世時祇樹  
園中既有立壇結界之制摩騰東至儀軌尚簡出俗之  
初三歸而已魏正元中始有律師上言戒法宋元嘉已  
後揚都乃盛甘露之名方等之義隨處建立流布漸廣  
嶽瀆要會南實長沙衡湘之旁緇流剝染白四緇磨咸

隸於茲不得不壯其度也舊有戒壇在明行寺律衆所  
居薨宇櫛比故於肘量微為隘焉城中寶刹曰太平興  
國者占上勝福德之地有山居閑寂之趣興化長老紹  
銑叢林之選四方響信所徇響臻安撫王公俾其新之  
由是商榷律儀講求教旨宇量既廣壇塔皆成得五印  
經始之規有四天擁衛之相俾夫受圓具者登降之際  
知此戒體衆善所生七證嚴肅三業清淨於戲惟善知  
識常利世間而作種種饒益不輕末學而示以威儀不

住無為而長於誘諭非名譽利養之徒所能及也既而  
俾蜀僧齊善齋書丐詞嘉其勤修行願增長成就一切  
佛事無有休息可記也矣故書其年月焉





武溪集卷九

欽定四庫全書

集部

武溪集卷十一

詳校官給事中臣李臺

檢討臣何思鈞覆勘

覆校官中書臣呂雲棟

校對官編修臣沈清藻

謄錄監生臣馮國柄

欽定四庫全書

武溪集卷十

制誥

秘書丞直史館知諫院蔡襄可右正言直史館

知福州

勅其官某朕慕承洪緒懼德不明博延忠果正直之士  
列於左右補其不及爾以文雅選在圖書之府而勁正  
之譽達於予聞故自衆人之中擢居諫諍之列果能蹇

宋 余靖 撰

謇匪躬以弼於違而云報國之勤可圖事親之期有限  
屢形封奏乞便庭闈朕忍以好諫之心而違爾就養之  
懇是用特遷諫職歸領郡符外則為爾親榮又知朕之  
不厭直言也乃身雖在外乃心無不在王室爾其勉之  
可

龍圖閣直學士文彥博可樞密直學士知益州  
勅成都古之建國其地險遠其俗富奢機杼纂組號為  
衣被天下而又西邇印茆南接徼外故常擇近密之臣

當撫御之寄具官某外和內敏才周識遠頃者將漕并  
土民不告勞繇是分之虎符付以戎律兼摠貊道以撫  
夷落威信克著號令甚明來者慕其綏懷倍者不敢侵  
軼二年於是境域以和故宜假其才謀移莅叢蜀遷之  
美職以示優恩爾其無貪寬厚之名無習苛刻之治謹  
爾條教休息吾民則得良牧矣往服休命可

龍圖閣直學士左司郎中知并州兼并代經畧  
明鎬可右諫議大夫

勅國家遣侍從之臣居統率之任蓋俾其外宣戎畧下  
恤民隱庶其臨機制變全師保勝而無遺策也具官某  
體識沈粹謀慮周密屢委方面而州境以清專督餽運  
而邊粟以阜唯并汾之要壤控戎索之衝道向擇周才  
以當重委士卒樂用如倚長城羗胡畏威未嘗近塞雖  
刁斗不擊而烽候甚明偏裨同緩帶之歡朝廷得高枕  
之寄嘉爾茂績屬於朕心延登七人之列仍總三軍之  
令爾其無情而志無驕而卒使夷落懷附而邊隙不啓

則朕之委任有所賴焉虔茲休命可

吏部尚書知亳州夏竦可資政殿大學士

勅朕以君臣之義股肱同體進退之際恩意固深厥有  
誠請實用嘉尚具官某才識通茂智慮周詳嘗登輔弼  
之聯徧歷內外之任頃以羗戎倍惠關隴宿兵遂由喉  
舌之官付以節旄之寵諒憂職而成疾遽乞身而願還  
是用改以方州遷其舊秩今覽來奏言其有瘳更思竹  
帛之功請就邊防之寄朕方四隅罷役二虜講和顧彼

壇陞無煩舊老嘉其志尚推以恩榮以其嘗預機衡乃遷此職當體予意往哉惟休可

翰林學士禮部郎中宋祁可吏部郎中

勅朕慎東俊德延登近署典司命令侍從帷幄所以宣邦國之大謀訪古今之高議所懷忠實率多規補宜增秩序以寵材傑具官某通識照遠人之儀表懿文高世學者宗師而自雍容朝闥領袖儒館奉常樂志東觀史編執簡撰述歛勤茂焉內閣以對右省更直咸推望實益



見材美登王室之署勸金華之講每觀通博之論愈知  
遠大之期集課遷官固有常制羽儀之用朕所望焉踐  
修厥猷往服休命可

鹽鐵副使吏部員外郎魚周詢可天章閣待制  
知成德軍

勅中山近胡常山為之脣齒國之屏翰此為衝衢必擇  
全才以兼文武之任具官某體識沉厚謀慮精深勇冠  
彈非則權豪共懾牙籌佐計則財用皆豐言無瑕玷動

必詳練故宜延登內閣之班出領列城之寄爾其外修民務內寓軍令召南之風方叔之任其兼之矣往哉汝諧可

兵部郎中李宗詠可鹽鐵副使

勅司會之府匪才不居任人之方求舊惟允具官某深識夷曠雅性通和簪白筆而立朝登軺車而問俗咸著美績間於周行嘗佐邦計實遷歲律三壤成賦九政均財備見其勤克謹於職遽闕吏故出領方州事資練習

是用俾其牽復書不云乎三折肱知為良醫汝其往哉  
可

左衛上將軍致仕楊崇勳可太子太保致仕

勅朕嗣守洪業責成輔佐故於勞舊之臣恩意至厚具  
官某頃事先帝逮予冲人入當機務之煩出領鼓鼙之  
任頃緣子累罷其虎符雖在退休之年授以環列之秩  
示從薄罰以肅羣臣今以燔燎禮成蓂蕭澤廣尚授  
印之重俾登儲傳之榮不次之恩汝其自省可

郢州防禦使魏昭炳可復觀察使

勅朕丕承帝圖夤念祀事裸鬯宗廟柴燎紫壇還御端  
闈渙發大號曠蕩所及滯淹必振具官某器度宏遠體  
識和雅謙恭自牧膚敏可嘉生於勲德之門不習綺紈  
之氣早登臚仕嘗委廉車當折衝禦侮之任有辭難即  
易之請俾從降秩用勵臨戎就第而來閑閤知懼宜蒙  
茂渥再渙前榮勉思竹帛之勤以酬雷雨之澤

秘書丞集賢校理孫錫殿中丞秘閣校理晁仲

衍並可太常博士

勅某等國家開圖書之府應奎壁之像所以游英俊而待材用也居是職者官無定員結課進秩固有常制錫富文博學懷溫厚之風仰衍名家令器著秀翹之望並列館閣能自修飭奉常清要禮樂是司書勞叙遷往服休命可

權府推秘書丞秘閣校理楊孜可太常博士

勅某國家分職事以待材俊苟稱其任必躡等而進之

其官之本聯則參用古制三歲一視其庸而改其秩以  
爾文思豪健識慮周敏參道山英俊之選贊天府浩穰  
之治煩而試之悉著成效奉常之屬實典邦禮清途所  
漸勿怠祇欽可

殿中丞曹穎叔等轉官

勅某等國家執八柄以馭羣吏董之以事任辨之以名  
品善則賞之以勸能者爾等悉以俊器久登王官知朝  
廷愛民之體得循良御事之要佐職專任咸著能聲容

臺尚局各遷華秩用示襄進往服嘉會可

右正言秘閣校理孫甫可右司諫知鄧州

勅朕稽式治道渴聞讜言必求端直之士以居諫諍之  
列庶補闕漏期於無過然而臣子之節忠孝為本厥有  
誠請難於重違具官某學通古今識照治亂智度純粹  
議論詳正文該史野行周忠信早預書林之選屬講容  
臺之儀知其懿實延登左右有犯無隱朕甚嘉之今以  
卜附先塋願守便郡朕不欲奪人之恩以自助是用增秩

本省分任要藩夫偃息而愛民與夫從容而納忠其道一也汝其勗之可

刑部郎中張鑄殿中侍御史劉湜並可三司鹽

鐵判官

勅某等昔者管仲以鹽筴而強諸侯建元置鐵官而佐常賦其來尚矣因山海之利足邦家之用必資幹吏以贊計籌以爾鑄器度沉厚當官有清勤之節湜才具通敏立朝有謇正之風臨民而簡易不苛參畫而浩穰稱



最並登司會之府庸謂擢材之選勉勵而守以荷休命  
可

內殿承制知夔州陳宗古可供備庫副使

勅國家列郡國之官分軍民之政惟是亭障徼道用武  
之地必擇材勇兼領戎戍具官某資性果銳名稱著聞  
任以方州用觀器畧已夔舊壤蠻獠雜居委之綏寧必  
選其材著於故事必進其秩援此成例於以推恩爾其  
安民撫夷以肅邊事無墜茲寵

前宿州臨渙縣令曹起可特授單州長史

勅某書曰宥過無大刑故無小盖用法之意期於大中  
越有附輕之科宜啓自新之路以爾頃在官守抵於刑  
書遽自隱藏遂以名捕近者按舉之吏頗為辯明如其  
本原特示矜恤處之散秩俾其自思無怠省循以荷昭  
洗可

光祿寺丞簽署并州軍士判官柳澥可著作佐

郎

勅某吾自邊陲宿兵以來思得高材強識共圖軍事故  
於帥府之所慰薦率俞其請冀用人之路廣而謀國之  
事精矣以爾詞章秀異識畧敏嚮者樞臣宣命於海  
之東其稱幹能數人而已爾在其選固已可嘉今著迹  
效所宜甄獎吾有高位惟待異才自勗圖功之心庶成  
舉類之美

都官員外郎知宿州李明允等一十四人

勅某國家設四善二十七最之令以辨羣吏之治自九

品已上京官釐務於外者率三歲一結其治狀有司以聞而登進之示天下之不公也爾等策名仕籍咸著吏能或領牧守以宣王風或分縣邑以勤民事贊賓畫均國用者亡不成績吏今以爾狀上其勞當遷推恩報勞勿忘祇荷

濠州鍾離令李覃可中舍致仕

勅某七十而還政於君傳事於子古之制也其能引止足之分而從退逸之樂者必優其秩而遷之爾久服官

政今請老於家而追古人之風吾甚尚之

安保衡可大理寺丞知縣

勅某朕常思靜退守正有行之人而用之以激浮薄今  
樞臣將命撫視邊徼而言爾往辭王官歸視父疾內行  
可尚兼有幹材大臣差助吾意則靜退之士不能違矣  
其善撫吾民無誤而知可

殿中丞士建中可依前官

勅某等古者人臣有喪三年不呼其門所以伸其恩也

爾等纏風樹之悲有樂棘之慕歲月其逝法當還臺賢者不敢過不肖者不敢不及國之典也往踐茲命可

太子中舍王致用等六人轉官

勅某等國家命官以古名莅事用今制寺省之職率不釐本曹之務而分任內外以視其成爾等各以器能出領事任或布慈和之政或稱幹濟之才考於有司悉應最令升榮朝紱進秩春坊咸為叙遷恭服休命

供奉官張秉王祖禮並授內殿崇班

勅國家承平日久而兵不習戰人不習勇自西羌犯邊  
歲用戈甲固常購募果敢訪詢智謀思得奇俊惟恐逸  
漏徧詔近列各舉所知今其應令以爾為薦更詢績狀  
頗見勤勞即登諸朝以示優寵爾其撫而士卒練而師  
徒毋貪功翫寇善修戎政無忝爾榮可

陳州觀察支使聶開可著作佐郎

勅某國家體貌大臣作鎮近輔賢其賓佐薦聞於朝詢  
之天官則稱其才者多矣即其幕中授以清秩所以示

吾寵待故老之意又欲其婉畫誠有所裨可

大理寺丞知陝府芮城縣李昭逢可右贊善大

夫

勅某國家自西鄙屯師關中之邑頗當餉道思得賢令  
長以均其力役受詔者以爾名聞從其薦延以百里今  
著最狀能字吾民序進東朝用示褒寵可

前濟州錄事叅軍監汾州永利西監武肅可大

理寺丞



勅某國家設鹽鐵之官所以籠地財而佐國用克舉其  
職則寵嘉之蓋旌其能非專於利以爾辦事之力體吾  
愛民之心則無忝矣可

武安軍節度推官監延州入中倉馮經可祕書

丞

勅某國家自西羌旅拒以來所頒爵賞嘗在繩墨之外  
雖所以收積俊乂蓋亦優禮帥臣爾自掌邊庾能足軍  
食帥臣慰薦稱爾之才故不還天官之選即加仙省之

秩越次之寵無怠前勞可

司勳郎中知洪州卞咸可衛尉少卿

十二人轉官同詞

勅某等漢制郡守諸侯相考理迹之尤異者就增其秩  
不易其任國家分命庶尹釐職於外必集其課而黜陟  
焉古之制也爾等悉以材敏聞於朝廷班宣詔條省察  
風俗能著治狀合於功令故嘉其最而寵之官卿寺郎  
曹金閨之籍遞加名服無怠恪勤可

秘書丞邠州通判王稷可太常博士

六人轉官同詞

勅某等國家以三載黜陟八柄予奪總攝羣吏撫寧庶民克著善狀則用嘉寵爾等或詞藻敏贍或學術通博題輿而贊郡條操刀而專邑治莅事賦政人得平一集其歲課率應遷格爾其毋貪名譽以希進毋畏高明而弛令吾不吝爵賞以待俊乂撫我赤子予而懋官其勉之哉可

禮賓副使張岳父義政可太子清道率府率致仕

勅國家因邕鄙之聳寵守戰之勞嘉其事君之忠式懋  
及親之寵某官張岳父義政勇敢之氣老而益壯頃歲  
西賊軼我障塞能率宗黨共登城陴身被金瘡口不言  
伐今以弼臣之請子舍之賢因其掛冠之年寵以垂紱  
之秩噫予非私於而家蓋欲壇場之人知圖功報國之  
榮也可

張岳母竇氏封縣君

勅人之至親莫甚於母子至行莫重於孝愛緣情推寵

所以勸勞張岳母竇氏母教以嚴家庭有肅早勤三從之善最成諸子之材宜疇湯沐之封以示閨門之訓可

西京左藏庫副使桑宗望可文思副使差充河  
北沿邊安撫都監

勅具官某國家以北平拒馬為塞積有年矣胡人通歡  
輶車不絕於道武事之備未嘗一日懈之故擇知兵謀  
曉時務者置使以統於堡障立佐以同其規畫以爾將  
家之子膽畧過人屢經煩使頗聞勤蓋是用遷之職秩

往護塞垣爾其撫士卒謹斥侯無起邊隙以副朝命可  
奏舉人前韶州樂昌縣令賈太冲可大理寺丞  
勅某國家視民無遠近之異必擇慈惠明察之長以撫  
安之爾字吾民於服嶺之外而能平獄寄恤時務百里  
安堵有聞於朝宜升京署俾漸榮路其無怠前志以服  
休命可

樂壽縣主可進封郡主

勅九族以和國家之懿二姓之好典冊攸重宜推茂恩

以相嘉禮某柔閑自立淑懿有成既在及笄之年將從  
鳴鳳之兆頻繫修潔宜為婦順之光湯沐升榮更益封  
君之號可

著作佐郎葉綱可秘書丞

勅某國家考課之令著於常典賞善罰否吾無所私爾  
文學起家慰薦遷秩求之以備不能無瑕俾增年勞盖  
示國法命之叙進猶踐前言書云令出惟行不惟反此  
之謂也爾其恪勤無怠荷茲寵榮可

內殿承制劉懷懿可供備庫副使

勅國家稽式舊制叙進羣官有勞必錄無善不顯爾久  
登仕路列於朝班莅事精勤老而益壯考其理最升遷  
使聯賞在必行無忘祇荷可

又自副使改右衛將軍致仕

勅朕少而用其才老必賦其祿又遷其秩叙以優其退  
閑具官某忠而能勤老且不懈邦國之奏績狀可稱嘉  
其止足上還印綬俾從內司之重特升環衛之職勉荷



恩寵以遂休寧可

西東供奉官閣門祇候知順安軍焦宗慶可內

殿崇班

勅某國家制壇守守亭障欲其將卒偕練號令必行上下相親動作相信詳擇材武以久其官以爾嘗領郡符徙治軍壘習知備胡之術克勤御下之體大臣保任稱之為能是用遷內朝之名品示邊城之委寄爾其謹烽候完器備無貪功以生事無玩寇而輕守勉思樹立以

荷寵榮可

大理寺丞陸經可責授袁州別駕

勅某國家制刑之中率又於下俾其畏忌以自祗飭爾以詞學見稱列在臺閣不能淑慎賄交於民白簡奏彈覆驗明著宜從左謫以示常刑可

刑部員外郎集賢校理薛紳駕部員外郎王正已太常博士蔣安石殿中丞杜術閻草等轉官

勅某等國家設耳目之官按舉吏職分牧守之任宣導  
王風至於佐治一圻專董百里皆擇材士俟其成績而  
寵嘉之以爾紳等器度和雅望實休懿威以臺省美秩  
出總庶務或埋輪而清列郡或分虎而守名邦或題輿  
而著善聲或馴雉而彰異政集其歲課進以官聯予不  
吝於恩榮宜各思於報效可

奏舉人前常州司理叅軍馬實可著作佐郎

勅某國家嚴資考之格廣薦延之路察於衆好冀獲翹

楚以爾久服官政勤蓋自飭庶獄審克郡無冤民章聞  
於廷宜用升進罔急所守以荷成命可

三班奉職王良臣可南京柘城縣尉

勅某丞尉之官其品雖卑而差用清流朱紫可別故儒  
素之士得之為榮爾本名家而補右職心苟不樂何能  
安人改佐百里茲為茂寵其謹奉家法無忝休命可

奏舉人前夔州錄事叅軍辛終吉可著作佐郎  
勅某國家分命天官專領選事外諸侯之舉尤異者必

視其績狀而考進之朕親覽焉以加獎擢惟爾文辭登第廉謹宿官州縣勤勞備嘗之矣宜升清秩庸勸吏能夫少而有志者老當益壯汝其勉之以蹈榮路可

著作佐郎何涉可秘書丞

勅某西賊倣擾自悔禍延安帥府能稱朝命以通其意而卒來講和羌夷柔順邊鄙寧息爾之周才實參戎事帥臣稱薦深所嘉尚苟得尤異而遷之不必累其歲月求賢若渴朕甚慕焉宜堅爾誠以服榮命可

廣南西路提點刑獄虞部郎中李永德可金部

郎中

勅某夫天下獄訟多矣專付郡縣之吏則恐鬱滯而不伸盡俟朝廷之報又慮填委而為累必擇明察總其綱領以爾嘗守一郡而寬猛得要俾察庶獄而按視必精果當厥職而民無怨讟結其成課升之左曹勉荷恩榮以副欽恤之意可

禮賓副使權環慶路黔轄張建侯可洛苑副使

勅某頃以策畧中缺號為材武故自關隴宿兵已來常  
使參之自偏裨升副貳總專達悉由試可而上下一言  
謂之稱職今通遠缺守擇而委焉夫命郡守以臨民遣  
將臣而治軍分文武之任為戰守之備矧惟鳴沙極邊  
與羌戎接壤兼而付之固不輕矣升其使聯用示優寵  
可

奏舉人前昭信軍節度推官孫億可大理寺丞  
勅某國家自一命而上集於天官得資計考歷以例進

必取薦延多者授之京秩爾以藝文來仕選升賓席必有嘉畫贊其善政露章稱導良用旌之勉守初節以荷榮命可

亳州司馬崇正可供備庫使

勅某頃授任符兼臨劇部寇戎在境烽候不明帥府繩違秋官議辟降從散秩用示深慈屬元祀告成萬物更始宜推曠蕩以恤滯淹特改使聯勉荷皇澤可

武溪集卷十



欽定四庫全書

武溪集卷十一

宋 余靖 撰

制誥

樞密副使諫議大夫河北宣撫使富弼可加正  
奉大夫輕車都尉仍賜推忠佐理功臣

勅朕昭事天地嚴配祖宗用祈洪休大庇黔首思與一  
二輔佐同茲戩穀故䟽需寵渥冠於羣倫具官某文窮  
變貫學通古今論議忠正有濟世之才謀猷高遠有經

國之用不辭患難而夷險一心累避榮寵而退靜自守  
繇是擢登宥密翊贊機衡容綏遠附邇之能致同文同  
軌之治朕方親執玉幣恭修燎燔而卿以撫循邊士不  
在侍祠之列朕甚思之所宜賜以凌煙之號進以執珪  
之秩疇其茂勲昭示異數忠之至者寵必厚汝其欽哉  
可

端明殿學士兼侍讀學士給事中李淑可加上

護軍實封貳伯戶

勅國家陽郊報本宗祏致嚴舉一歲之明禋受百神之  
介福凡我臣工均茲茂祉臣某望著人表才稱國器博通  
今古治理之術洞照天人精禋之源趨軒陛而持橐早  
居清近侍帷幄而執經率多規益乃樂中和之職戢直  
承明之廬出班詔條專領方面禮成敷佑罔有外內崇  
其秩叙進其勲爵式表休命汝惟欽哉可

諫議大夫御史中丞王拱辰加勲

勅朕親執珪幣以事上帝升配祖考皆由舊章假爾近

臣相我元祀茂布王澤用均神休某材智少雙器識兼  
遠首中藝文之選鬱為邦國之華頃在禁林而能潤色  
鴻業嘗領京劇所以表則四方顧訪早知其國器糾正  
用委於邦直會朝之次古稱獨坐之雄耳目所寄今為  
中司之重咨栢臺之偉望贊觚壇之縉禮百神受職萬  
國歡心式布受釐之渥以表同寅之寵

皇親率府已下

勅朕承七廟之鴻業荷二儀之並貺肇禋告土對越明

靈稽式盛容誕布純佑休寵所被宗枝實先某等孝友  
立身信厚成性並承詩禮之訓自敦名教之樂青宮列  
衛式表茂親朱紱侍祠宜頒異數既廣蓼蕭之澤用昭  
葛藟之恩公族之榮聿加勲賜

殿前都使已下

勅朕執鬯世室升煙泰壇修親祠之儀遵陟配之典恭  
承貺施大報靈祇思與帥臣均茲茂祉某等久服戎事  
早登勇爵遙董親軍外固吾圉自西羌倍惠數歲不庭

雖戍兵未得脫甲而胡人不敢近塞緊爾善守倚如長城在禋祀之辰當封疆之寄蓋重爪牙之託式加名服之重

省副魚周詢等並加大夫階勲

省判同詞

勅國家肅若舊典稱秩元祀吉土拜貺高煙達誠爰均敷錫之祥不為專饗之美某等器識開敏資性端方咸稱劇才佐我邦計經入有度展富國之謀均節有常得足用之要惟匪頒之至廣皆贊成而知素宜崇勲賜用

寵勞能

上將軍致仕楊崇勲加食邑七百戶實封三百

戶

勅國家接千歲之統逆三神之釐極燎薦信郊丘成禮  
式均茂渥無忘老臣某逮事先朝休有令望積勤勞而  
奉上歷中外而成績重率侍衛則忠謹足稱翊亮樞機  
則良實可任亦嘗出領方面付以節旄用威戎夷咸所  
倚賴早敦知止之分久從還政之樂明禋斯畢大賚有

加方念安車之寵宜益爰田之賦

大將軍防禦使蔡興已下至遙郡刺史等並加

食邑三百戶

勅國家接千歲之統逆三神之釐極燎薦信郊丘成禮  
式均茂渥下逮爪牙某材武夙成忠果可任少分戎政  
則申嚴而有聞晚登環列則勤勞而不懈方資拱極之  
重仍展陪祠之恪圖叙勞舊用䟽恩寵

廂都指揮使已下



勅朕膺天地之貺荷宗廟之靈聿修至誠式舉元祀均  
此介福及於具寮某等咸以武功統我二旅出授封疆  
之寄入居宿衛之勤備彰智勇之資以當親信之任宜  
膺寵渥勿怠肅祇

省府推判官

勅朕親享太室以展孝思對越上靈以嚴祠事天地並  
貺福祿攸同駿奔於庭宜均寵渥某等縉紳令望臺省  
俊游或同經度之謀或副浩穰之政贊祿將而在列侍

柴燎而克勤錫以轉勲欽茲成命可

諸司副使已下至崇班

勅朕裸皀世室柴燎泰壇薦繼孝之誠嚴報本之祀馨香上達明靈降鑒樂與從臣同此介福某等衆推美望籍著內朝或趨軒陛而服勞或居屏翰而分寄駿奔在列固夙夜之可嘉恪勤居外亦爪牙之所託咸進爵邑用示恩榮可

贈太尉允寧女趙氏封縣君

勅朕親享太室嘉薦園壇上以承七廟之靈外以受百神之職均此景福被於綿區矧惟宗枝宜豐優渥某人女某等肅雍成性柔懿著聞頃緣棠棣之愛嘗蒙脂澤之寵蘋蘩奉祀式耀華宗湯沐改封當殊異姓宜體篤親之意無忘令族之恩可

右正言孫甫等加恩

勅朕尊事上穹升侑列聖誠意蠲潔明靈顧享翕受福祉被於區域具官某等識理閎遠器量方正咸自衆多

之選綴於侍從之列或張旌而使絕域以修隣歡或分虎而守鄉邦以便親養或以節促召而脂車在途雖阻侍祠之肅豈忘均釐之典悉加勲賜以表予懷欽荷恩榮更勵而節可

美人張氏父堯封贈祕書監可贈工部尚書

勅朕舉修元祀祇薦至誠裸獻宗祊柴瑱泰時祖考顧享氣象休嘉欽荷純禧均布繇宇外惟百辟內則九嬪悉推恩寵逮於存沒某人父某素履淳厚清節浚明深

蘊美才不登顯仕是生令淑入侍宮闈常自抑畏慎守  
謙約退讓名品章明柔順嘉其遺德故用追褒俾由秘  
府之華驟陟文昌之峻式頒明命用賁幽阡可

興平郡主等

勅敦叙九族糾合同姓皆詩書所傳政教之本矧樞燎  
之成禮宜葛藟而伸恩興平郡主趙氏等雅性幽閑淑  
懷信厚早被公宮之教既兼侯國之封顧柔良之有聞  
惟肅雍而成則易之美地庶耀靈源

百官父在者

勅人之至行篤於天性國家之教常必先之父之貴重  
則賞延於子子之通顯則尊及於父蓋所以敦三綱而親  
萬國也某父某賢業自守家聲必聞詩言禮立克謹厥  
訓聿傳弓冶之嗣服在簪紳之列朕方稱秩元祀懷柔  
百神均此介福被於率土嘉其忠教綏以寵章式昭肯  
構之賢以慶高門之祚可

母在者

勅古之賦祿貴於逮親雖居晉楚之富靡及雞豚之養  
矧惟白華潔膳赤芾侍祠西雖承命北堂拜賜國之善  
教吾其捨諸某官母某氏德劬嬪風義高壺則克懋慈  
闈之訓聿生閨籍之賢屬柴燎以葢儀被蓼蕭而洒澤  
庸錫丹駟之命以彰高閼之祉可

父亡者

勅父子天性其親一也朕躬執珪幣升侑祖宗蓋所以  
報本崇祀奉先追孝簪組在列亦念其親宜推渙恩上

及先正某亡父某高節善行束修其身遺德餘懿垂烈於後喜肯堂之令嗣霈漏泉之茂渥密章為貴壤樹之光可

母亡者

勅朕贅壻世室欽柴泰壇合享天地升配祖考備物牲幣所以展奉先之誠䟽恩存沒所以廣顯親之孝某亡母某氏言容著範禮訓傳家治汙宣勤珮環有節果生王國之彥久服朝家之寵宜因珪組之榮用追湯沐之



賜可

百官妻

勅夫家道正而天下治蓋國風之始人倫之大皆本於  
夫婦也朕潔誠絜祀奉先追孝外修牲幣之薦內有采  
盛之助翕受百祿敷錫四方樂與羣倫恩被伉儷某妻  
某氏柔明著美淑茂流聲居無出閫之言動有鳴環之  
節作嬪良士服我周行宜開石窀之封以寵金閨之籍  
俾其齊家輔國有所先後則庶幾乎治矣

王相公贈官

勅朕躬執珪幣升侑祖宗蓋所以報本崇祀奉先追孝  
纂組在列亦念其親宜推茂恩上及先正某父某邦國  
元老經綸煢材毗贊冲人燮調至化內脩百度外撫四  
夷豐功格天遺愛在物厥有善繼齒於朝序用疏泉壤  
之澤追錫天臺之寵密章為貴幽窆之光可

工部侍郎叅知政事陳執中三代曾祖嵩贈太  
子太傅宜特贈太傅

勅國家疏爵而尊賢稱情而制禮其德懋者其位顯其  
任重者其數優體貌之臣式叅柄用褒賁之禮宜及曾  
聞某官曾祖某令望浚明雅懷冲曠含章不伐積善有  
開貽厥孫謀弼我朝政錄其先範式佇遠猷俾從儲宥  
之榮超居帝傅之重下光泉戶庸顯世勞可

曾祖母黃氏贈郢國太夫人

勅國家升用輔臣褒崇先正所以展子孫之志示朝廷  
之光昭起國封用賁嬪則某官曾祖母黃氏徽柔植性

淑懿流聲服圖史以增華布言容而成訓綽著可嘉之  
美果膺有後之祥贊台鼎之崇上恢祖闡錫山河之賦  
式耀泉局

曾祖母黃氏追封德陽郡太夫人

勅朕圖任舊臣共政期致於治追賁及於三世以旌其  
遺懿餘烈之有紹也某官曾祖母某氏作嬪茂族柔明  
著聞閨闈之則人以為訓福不在其身而在其後厥有  
俊傑用勵翼於皇家欲其輔朕以紹文考之耿光故顯

其祖之配而啓之國逝者其鑒茲可

祖光嗣太傅遷太師

勅夫德之所積其流必廣善之所鍾其後必大故挹其  
流者知其源用其後者顯其祖此國家訓人之道臣子  
興宗之美也某官祖某五代之季養志丘樊榮利內恬  
羽儀外戢位不充於當世福乃流於後昆子舍稱賢先  
朝倚之為棟幹孫謀襲美冲人用之為股肱頃貳樞庭  
已彰懋績叅持國柄再佇明謨爰念世勞用推祖閥大

門之懿奕葉可稱俾繇帝傳之崇式進師臣之秩漏泉  
垂澤聿備徽章可

祖母孫氏贈安國太夫人

勅慎簡賢佐上所以緝寧邦家追崇祖室下所以申順  
情禮家聲克劭閭則攸先某官祖母某氏柔嘉秉德幽  
閑成性珩璜中節蘋藻敦風克垂燕翼之謨篤生弼諧  
之哲福既宜其家室澤宜滲於泉壤誕啓土宇用賁松  
楸可

父恕太師中書令尚書令榮國公改封許國公  
勅昔鄭武公父子並為周司徒天子有袞服之賜詩人  
著緇衣之詠蓋預執國柄號為世官古難其人今得良  
佐美其子而追褒其父亦古之制也某官父某亮節致  
君周才應物事我烈祖鬱為名卿總邦計而經入有章  
贊宰司而裁成無外粵有令器克紹先基吾欲使天下  
知才臣之子復叅大政故以節名還而共邦事嘉其善  
述之志用霈流根之澤可

母李氏贈崇國太夫人

勅國家之制同體莫重於股肱人子之心揚名以顯其  
父母朕所倚注義有褒崇某官母某氏生自德門嬪於  
邦彥淑靈著詠宜家室而浸昌聖善流稱穆閨闈而有  
翼我有良輔爾之令人式昭駿假之賢本自斷機之教  
加之象服用節幽泉可

母王氏贈鄂國太夫人

勅夫能擇其臣者君之明能顯其親者子之孝總是二



美朕所冀焉某官母某氏節茂米蘋德昭流芬夙彰婦  
順克振閨風是生俊良為予輔弼爰洒漏泉之澤用表  
宜家之賢寵以副筭光於幽窀可

皇后曾祖太師尚書令兼中書令追封魯國公  
曹芸可追封魏國公

勅朕接千歲之統逆三神之釐致孝克享亶誠昭薦馨  
香上達明靈降鑒渙發大號被於四方荷祖宗之休成  
吉蠲之禮染盛之潔實惟內助欽其遺懿宜示追褒皇

后曾祖某稟常山之英負全趙之勁雖羽儀未展而堂  
構聿隆篤生元勲事予藝祖豐功在物茂德庇人肆惟  
眇躬得是天合嘗極人臣之贈用昭肺腑之榮更徙大  
國之封以為中宮之寵可

曾祖母追封陳國太夫人張氏可國太夫人

勅朕合祭天地升配祖宗四海來助百神咸秩翕受介  
祉敷錫庶邦重念夫源之深者其流必長德之積者所  
憑必厚朕既恭執鬯瓚上奉七世而中宮敵體以母天

下肆其褒贈之典宜及曾聞俾其三廟異室同榮合配  
茲惟享國之樂行古之道也某氏毓德貴門作嬪令族  
能謹卜隣之教以成興宗之福俛天作合實荷遺懿滲  
泉流澤庸均茂渥徙封湯沐垂耀泉途可

父贈開府儀同三司太師兼中書令曹玘可贈  
尚書令

勅朕承七廟之重守億年之基奉順先猷欽舉元祀裸  
獻宗祏禋燎園壇三神垂禧百禮咸秩大均霈澤被於

綿區矧惟中宮之尊內治所主固宜同茲介福光於外  
宗思美周姜之儀庸表塗山之盛皇后父某積德至厚  
含章特立生自元勲之門專於儒者之行擣光令族坦  
夷曠之懷握蘭華省抗令終之節雖當世不顯而流福  
無窮覩天發祥嬪虞作合奉祖宗之祀共罄純誠荷天  
地之休實繁遺烈式崇褒賁用企儀刑俾自龍池之榮  
更茂天臺之秩庶光壤樹式耀桂宮可

母贈吳國太夫人馮氏可國太夫人

勅朕輶輶清廟欽柴泰壇精誠備至神明昭格而又恭  
發謚冊追奉闕宮上遵建隆之典聿同章聖之懿孝思  
克展祠事有嚴還御端闈渙發大號受天百祿敷佑四  
方眷言內助同茲茂祉等其立愛之念頒此顯親之榮  
某氏積善有開含華不耀自守珩璜之節克謹葛覃之  
訓采蘋之職遺範於華宗夢月之祥有歸於禁掖爰布  
漏泉之澤用展結禱之思式加象服之儀聿重閨門之  
貴可

德妃沈氏曾祖升贈太師宜特贈尚書令

勅朕丕承洪緒稱秩舊章羞潔染盛親享清廟贊奠珪  
幣祇薦柴壇神靈降格福祉休應思與率土同此純禧  
外庭播紳朕之輔佐咸布寵澤被於存亡矧惟先朝妃  
御協宣陰化宜有恩榮逮於祖禰某官純誠格物懿行  
聞時聿生柱石之賢以為廊廟之用積德至厚流福無  
涯肆惟曾孫實叅內職荐被密章之寵彌增壤樹之光  
宜加三獨之榮以示六官之美可

曾祖母追封燕國太夫人華氏宜封國太夫人  
勅朕親享太室展追養繼孝之誠必祀園丘成報本反  
始之禮精意所感繁祉來同內外職司恩渥咸被某曾  
祖母某氏婦順修飭母道嚴明聿生佐命之賢以濟奕  
世之美調鼎之彥已顯於廟堂采繁之範更流於宮掖  
今以雀釵之貴荐加象服之榮推此恩華共光存沒可  
祖贈太師尚書令冀王倫宜特贈兼中書令

勅朕嗣守丕業奉順先猷三歲一郊百神受職芬芳上

達明靈降休式敷純嘏決於區域恩被於遠當由近始  
澤浸於外必自內均某祖某以廊廟之才逢風雲之會  
功在彛鼎位登台衡歟有令孫備職先朝坐論婦禮有  
光彤管因此視卿之秩嘗啓真王之封宜兼雞樹之榮  
更耀容章之賜可

祖母追封秦國太夫人田氏

勅朕純孝以奉於先廟精意以事於圓穹裸獻必虔燔  
燎惟謹而天地並貺神靈降休致函夏之大寧荷文考



之成烈羣后追同於謚號貴嬪當優其情禮褒賁祖妣  
舊有典章某氏早流淑聲作合元宰陰德至廣後嗣其  
昌肆惟宮闈得彼恭懿彤管之職為式掖廷副笄之榮  
宜均逝者可

父繼宗贈兵部尚書宜特贈

勅朕昭事上帝懷柔百神繼孝宗祐薦誠吉土仰荷純  
祐爰霈茂恩內外之職存亡被澤某名臣之子賢行著  
聞早垂紳而立朝嘗象河而命秩粵有令淑備於嬪嬙

祇事先朝協贊內職肆惟追賁殊於外庭宜進天臺之  
班式為泉壤之耀可

母追封福昌縣太君吳氏宜特追封

勅朕世室執鬯泰壇升煙昭薦至誠以荷並貺誕布德  
澤均被幅員眷惟掖廷宜同介福某母某氏淑靈素著  
聖善有聞家庭甚嚴子姓蒙順選納之盛邁於先朝褒  
賁之崇屢光幽窆茂恩所及營魂有知可

樞密王太尉三代

曾祖建福贈太師中書令可贈兼尚書令餘如故

勅朕親享七廟昭事上靈牲玉備具粢盛豐潔百神咸秩二儀以和嘉與率土同茲介祉眷惟俊傑叅掌樞務能緝熙於庶政宜褒賁於遙源具官曾祖某秉德有經含華內照不希當世之譽克集高闕之福皇家啓運嘗得佐命之勲眇躬繼統更獲同寅之輔屬嘉壇之已事均惠渥以無垠宜因右省之崇兼進中臺之秩錫茲明

命式耀幽阡可

曾祖母追封魏國太夫人賈氏可追封國太夫人

勅朕躬款宗祏祗薦靈壇三神以和百禮咸秩誕受禧祉均被臣鄰矧惟輔弼之聯素展忠勤之效宜示便繁之數追賁曾高之室某曾祖母某氏言容有則宗姻為範卜鄰傳芳早勤胎教斷織成訓聿光彤史福善所積源流必長垂休後昆再世為輔人本其祖澤流於根更

開大國之封以為令族之耀可

祖祚贈太師中書令兼尚書令可追封國公

勅朕清廟奉先柴壇薦信天明地察克侔昭事之儀祖  
德宗功叙於陟配之典肆類成禮百神垂休發為霈澤  
被於函夏樞近之職寵數宜隆某祖某懿範闕遠素行  
夷曠愷悌之政存乎風謠鼓鼙之勲著在方冊末年冲  
退脫迹寵榮世生忠賢為國輔弼閱閱相繼邦家所毗  
嘉孫謀之有成增公爵之攸重可

祖母追封陳國太夫人嚴氏可追封國太夫人  
勅朕祇薦祖宗合享天地精誠上達神靈來顧含生之  
倫罔不蒙澤某官祖母某氏德芳蘭芷行潔冰玉女儀  
修飭母道嚴明肆惟令孫克奉慈訓對掌機軸備悉忠  
誠追述遺懿用增恤典蓼蕭之澤泉壤為光可

父溥贈尚書令兼中書令追封魯國公可贈太  
師

勅朕嗣保丕基奉順舊典致誠恤祀尊祖配天四海駿

奔三神純佑誕布霈澤被及中區矧惟叅典機衡陟降  
左右因予繼孝之志特厚顯親之榮某父某佐命元勲  
興邦碩老經綸王業勤勞我家翼賁竭其股肱締構同  
於柱石雲龍胥會寰海具瞻功格皇天德垂後裔肆惟  
令嗣輔予冲人祇畏一心贊襄萬務陪祠展肅追遠均  
恩宜因國爵之榮更益帝師之重可

母追封齊國太夫人常氏可追封國太夫人

勅朕統承鴻祚稱秩明裡親享七室升侑列聖嚴恭寅

畏克終祀事歛時百祿敷錫兆民嘉與輔臣共蒙繁祉  
某母某氏柔明著美淑茂流聲從婦順而有融鑒女圖  
而成德聿昭慈訓克懋閨風勗子舍以能賢被國恩而  
為耀再加象服式賁松墟可

母追封丹陽郡太夫人申氏可追封國太夫人  
勅朕齋明卹祀祗祓薦誠親陟靈壇恭奠嘉玉百神望  
秩四海駿奔推此介福發為大號粵惟良輔宜先茂恩  
某母某氏託質華族作嬪良士德有春蘅之芬行含秋



霜之潔聖善之福克昌厥後式嘉肯堂之嗣庸洒漏泉  
之澤可

兄貽正贈太師可贈中書令

勅朕祇脩裸鬯躬執珪幣至誠蠲潔上帝顧臨九州駿  
奔萬國嘉靖思與臣庶同茲休祉矧以國婚之重宜廣  
天倫之愛某兄某名臣之子素行自飾早登赤藪之士  
尤號白眉之良功昭於時位不充量屢推恤典以寵華  
宗庸為戚里之榮亦表相門之美增崇西省式賁京原

可

嫂追封鉅鹿郡太夫人魏氏可追封郡太夫人  
勅朕親歎祔室恭陟泰壇昭薦至誠用伸美報翕受景  
貺均被函宇眷惟輔政之臣當厚元宗之寵某嫂某氏  
幽閑飾性柔懿流聲宜家室而有歸訓閨門而允穆粵  
有賢傑贊予樞機庸啓郡圻之封以表天姻之重丹駟  
增賁窀穸為光

富副樞三代

曾祖處謙贈太子少保可贈太子太保

勅朕歟七世之廟以展孝思陟八觚之壇以嚴祀典神靈昭格福應休嘉荷天之祿敷祐於下惟時邦傑協宣機政克奮同寅之力聿成共濟之美庸褒先範宜渙茂恩具官某曾祖某擢光內融含德獨秀動為禮義之表居為丘園之貴諒流令則實生懿孫皆憑曩基用成遠器蓋示遙源之寵追升儲傅之華貴此幽泉用昭榮祚可

曾祖母追封彭城郡太夫人劉氏可追封陳留郡太夫人

勅朕親執鬯瓚祗薦牲玉蠲潔至誠昭示大報九州率職不為獨恭百神降祉靡敢專饗嘉與良輔同此純休具官某曾祖母劉氏家有表儀動循禮訓珩璜中節洎洎宣勤源流深長福祚繁衍是生俊傑為朕股肱宜因國棟之憑再錫郡封之寵式彰遺訓垂耀幽阡可

祖令荀贈太子少傅可特贈太子太傅

勅朕奉祖宗之謨承天地之貺修崇元祀用昭美報翕  
受景福敷錫庶邦輔佐之臣名禮當厚推恩及於祖禰  
同德均其誠孝具官某祖某懿行絕俗精識鉤深天生  
忠厚之資家襲義方之訓克茂世閱聿成孫謀叅處機  
衡之重時惟廟社之福嘉是遺懿宜推茂寵俾從三少  
之選超登二傅之崇下飾泉扃用隆褒典

祖母追封金城郡太夫人趙氏可追封南陽郡

太夫人

勅朕純孝以祀宗祧精意以享天地芬芳上達肝嚮下  
臨歆承洪休渙發大號爰均追遠之澤庸廣奉先之禮  
具官某祖母趙氏閨壺著範宗嫻為則婦順自飭慈誨  
有成訓彰圖史福流後裔再賁丹輶之寵用昭幽窆之  
光可

父言贈太子少師可特贈太子太師

勅朕昭孝薦誠報本崇祀執殯世室升煙泰壇馨香遠  
聞靈祇克享萬國嘉靖庶物繁膺實荷神貺救寧繇區

斯皆輔佐協恭夙夜宣力共致至治洽於飛沉宜推茂  
恩兼被存沒樞密副使富某父某識度周物文敏起家  
名高邦伯之政職重郎曹之選位不充量福流後昆粵  
生柱石之材克成廊廟之器庸嘉許國之愿實本教忠  
之德再優恤典式顯世勞可



武溪集卷十一